

# OMUKWETU

Registered at the General Post Office as a Newspaper

10c

## LILJE A XULIFA

*Ngenge ongeleka oya hala okupita nawa nayi ninge ngaha-Lilje*

HANOVER, Ndwishilanda Lautokelo (RNS). Omumbishofi Lilje ou a kwafa mewapeko l'Oukwaluther wOvandowishi konima yefindano etitatu "Third Reich" okwa xulifa oweenda waye kombada yedu omafiku aa, omolwoudu womutima. Okwa li omulumenhu weedula 77.

Okwa kala omumbishofi omukulunhu woitukulwa 8, yOvakwaluther. Okudja 1952-57, okwa li omupresidente wOngongahangano yOvakwaluther mOunyuni.

Ongoshilyo shEfina lEwilikongudu lEengeleka dahangana mOunyuni, okudja omudo 1948, eshi ehanganano eli la dikwa, omumbishofi Lilje okwa li umwe womovapresidente (co-president) okudja 1968-75, mehangano eli.


"Ame onda anya okukala oshilyo shehangano olo la li tali kodjifa epangelo laAdolf Hitler. (Omumbishofi Lilje okwa li a tokolelwa efjo eshi a li a valulilwa mwaavo va li va hala okukufa ko epangelo laHitler keenghono)" "Nonando onda kala inandi hala mehangano eli onda kala ndeli manga kumwe naavo va kala tava pumbwa ekwafo la nge mouhakumwenyo."

"Ame onda itavela kutya ope na efimbo li-mwe olo elongifo loshikulumbwati tali kandula po omaupyakadi. Pefimbo laHitler kape na umwe a li ta dula sha shi lili shihe fii okulongifa eenghono."

Eshi a nyamukula mokupulwa natango okwa tonga ta ti: "Omunhu ito dula ashike okunhuka nokulongifa eenghono, e to ti kutya eshi osho oshinakuwanifwa shomukriste. Okulongifa eenghono oshi li ashike mondjila ngenge owa kendabala komikalo di lili nokulili, pambili, ndele ino finda.

Metumwalaka laye eshi a dja mo moupresidente, omumbishofi Lilje okwa fatulula okukala Omukwaluther nOmukriste nhumbi tashi ti.

tala kep. 4



Mefano otamu monika meme Terttu Heikkinen gumwe gwaamboka ya shanga okambo kotango mOshixwaga. Omumvo gwa zi ko opo ya adhikile ya mana omambo gamwe melaka ndika. Ehokololo lyu udha tala kepandja 6.

## OHOKWE YOKULESHA MOSHIGWANA INAYI YAMUKULWA NATANGO

Anuwa: "Oondunge ihadhi landwa, ohadhi valwa omuntu." Uuyuni auhe inau vululukithwa ketumbulo ndika. Aavali oya ningi a-shihe taa vulu aanona yawo ya tumwe koo-sikola ya likole oondunge dhomokulesha.

Okutala meni lyomudhingoloko gwetu oku na mboka taa pandula kehukumokomeho ndyoka lya zi moondjila nomomatungo taga adhi-ma. Ihe yamwe oya hala okusimaneka shoka sha hololwa po kelongo lyOngeleka naandyoka lya taambwa kEpangelo.

Mulyo omwa zi mboka taa lesa elaka lya-wo niidhumo. Omwa zi mboka taa takuma. Oyendji omo ya dhimbulula kutya nani omuntu kehe okwa simana koshipala shaKalunga, nesimano lye olya pumbwa wo okugamenwa komuntu omukwawo.

Inatu vululukwa ashike naashoka sha ningwa po kOngeleka kombinga yokulesha moshilongo shika, nenge kEpangelo, aawe. Ihe itashi ti wo kutya inatu pandula kushono sha ningwa po kuyo.

Omapulo omanene opo ge li natango ga pumbwa eyamukulo:

(1). Natango katu shiwo kutya otu na moshilongo shetu oopelesenda ngapi kaadhi shi okulesha nandonando. Nenge oopelesenda ngapi tadhi ndandaidha, osho wo mbokaye shi okutula kumwe uunyolo nomatumbulo. Naamboka taa lesa nawa yu uviteko ashike.

(2). Omambo niifo moshilongo shika halwindji tayi thiki mpoka pu na aantu nenge aantu itaa thiki mpoka pu na iinyolwa niileshwa - Otashi kandulwa po ngiini shoka?.

(3). Pethimbo ndika opu na iiningwanima oyindji tayi inyenge mokati kaantu. Otayi vulu naanaa okuhila aantu ya leshe. Otayi pendutha wo omadhiladhilo gawo. Ihe emanguluko oli li peni okunyola iinima mbika?


Moshilongo oshikriste mwa tulwa pokati kEpangelo nokOngeleka, omalalakano gatatu itaga nyengana okuthikwa mugo:

(a) Aantu ya adhathane noya ende pamwe momadhiladhilo kekwatho lyiinyolwa. Ya nwethathane mo.

(b) Okwiigidha emanguluko ndyoka lye tu zile mombinzi yaKristus ketaandelitho lyiinyolwa.

(c) Nokutompela aantu oshili yomonkala-thano noyopaKalunga.

Pethimbo ndika omuhambudhi ote ende a tila aadhipagi, nando oye ha hambula omagonga. Osho tatu ende twa tila ombepo yu-keenakalunga, tatu yemata kaantu aapwidhi naakukutu, ihe otwe ya tindila shono tashi ya nengeneke omitema - iinyolwa yoparistse.



**Omusitagongalo Sebulon Ekandjo ngoka a langekwa kEpangelongeleka megongalo lyOniipa. Tate Ekandjo okwa kala amushanga gwOmukwetu uule womimvo 10. Nonando tate Ekandjo ina longa methimbo epu, ombili neifupipiko owo aluhe uukwatya to koneke muye. Tala pepandja mpaka oshinyolwa shoka e tu nyolele.**

MOngeleka ya Elok omu na eipando ndika kutya oshigwana oshi hole Ombimbeli, Okatekisa nEimbilo. Omukalo omwaanawa negele osho gu li. Ihe omapulo moshinima shika otage ya:

\* Okwa konekiwa tuu kutya aantu yeni po unene haa landa iinima mbino?

\* Otatu piti we tuu muukriste wa tseye ashike Okatekisa momutse noku shi we sha shilwe? Pamwe otatu ka kala tu na aakambelindunge aakriste?

Omikundu mondjila yokukokitha oshigwana mokulesha, odha andjakana shi vule uunima mbuka nda holola mpaka notadhi pumbwa okufulwa muule.

Sebulon Ekandjo

### EPUKULULO

**Moshifo shaFebuluali No. 3 pepandja 5 opwa shangwa kutya oshilonga shomusamane Brückner ngoka a shunithwa kepangelo lya S. Africa kuNdowishilanda lyUuninginino, osha thigilwa Rev. Habelgaarn ano gwa FELKSA keshi gwá FELKSWA ngaashi sha tumbulwa. Osho wo pepandja lyotango moshifo tuu shika opwa tumbulwa Kawe, ihe oye Beata Nakamwe.**

**Ethimbo lya thiki, Oshilongo, shaKalunga she ya popepi. Itedhululeni, mu itaale elaka etoye.**

Ependa lyaKalunga Johannes sho lya yi mondjedhililo, pethimbo ndyoka Jesus oku li muGalilea. Oshilonga shaJesus muGalilea oshokulonga aantu, opo yi itedhulule yo yi itaale Kalunga, Omuhupithi. Melongo ndika lyaJesus omu na iinima itatu mbyoka tayi gumu oomwenyo dhetu.

Jesus ote tu lombwele ta ti: "itedhulula". Pateksti ndjika elombwelo ndika olya lombwelwa Aagalilea, ihe paushili wOmbimbeli, elombwelo ndika ongoye to li lombwelwa nena, opo u itedhulule u ze momalimbililo.

Oteksti ndjika otayi londodha kutya "ethimbo,, olya thikana, za ontuku iilonga yoye yomilema. Etha ondhinokalunga, eikukutiko netangalalo. Shika shi tseyana nawa, kutya ethimbo olya thikana. Kalunga a pangule uyuni: omuntu kehe pailonga ye.

Jesus ota ti "itedhulula", oshoka "ethimbo lyaKalunga" olya thikana, Messias oku li pungoye ethimbo kehe. Shoka to pulwa kuJesus osho eitedhululo, evalululo. Thikama nena, tameka oshilongatumo mokati kaashitwa yaKalunga. Fala ko elombwelo ndika lyaJesus ngaashi to li lombwelwa mpaka.

Taamba etumbulo ndika li kale li li meni mowenya gwoye, ethimbo kehe, oshoka Kalunga okwe ku tegelela nena, u katuke onkantu yeitedhululo. Etha nena omalongo ga-puka, taamba nena Kristus, ngoka te ku pe omwenyo gwaaluhe. Ye oye awike ta dhimi po oondjo dhoye.


Etha edhiladhilo lyokutya opo to lyaalyaa ko, kuume, oshoka olya za musatana. Omwiimbi ota ti: "Aalumentu Aaninive otamu ka mona ehupitho, oshoka omwiitedhulula sho mu uvu euvitho lyaJona." Nangoye oto ka mona ehupitho sho wa taamba euvitho ndika lyaKristus, Mat. 4:17.

Oshilongo shaKalunga oshi li pungoye nena, kokutya Kalunga oye ta pangele uyuni nO-hapu ye yOmwenyo. Kalunga okwe ku hoo-golola opo u kale to mu longele ethimbo kehe. Inekela Kalunga aluhe nando ou li muudhigu.

Hedha kuJesus e to hempulula oondjo dhoye adhihe, u mone omwenyo gwaaluhe. Ngele o to dhini ehiyo ndika, oto kanitha omwenyo gwoye. Ehempululo lyoondjo otali ku longo eikonakono, opo u mone shoka shi li pokati keni naKalunga. Kristus ke tonde ando aalunde, ihe okutonde iilonga yuulunde.

Ethimbo lya thikana, oshilongo shaKalunga she ya popepi, itedhulula, ngoye u itaale Elaka Etoye."

**Nikodemus - Nuuyoma Ntinda**



**Una tatu popi "OMUMVO GWOMAMBO" nziyanziya omadhiladhilo getu otaga hililwa komundohotola gwelaka lyaAawambo, omusamane Toivo Tirronen, ngoka a longo oshindji mokuhumitha ko elaka ndika noku li i ipyakhidhila natango nalyo.**

## **INAMU LYA PO VALI OIKUVILA YOVADINKALUNGA**

Ohamu kala ngo tamu popi nye mu li pufye tamu dana eenghama nafye. Oshike ihamu kala kuvakweni? Fye ohatu mono kunye. Omutenya tamu popi, oufiku tamu ngungula. Opo nde mu mwene penya efiku limwe momulaulu nonde shi konakona, kutya nani fye ohatu shekifa edina lOmwene kovapaani na otava nyengwa okulidilulula moshili.

Ngenge owa hala okuhokolola oudjuu woye, kundafana nomukriste mukweni. Oshikuvila shoye shi lyeni naye. Oufyoona woye ke wu lile, pomushiivikile woye, omwiitaveli. Eshi oshidule eshi to tulwa poluhaela komudinkalunga, omunhu o ke na fiku ne li dilulule molwaashi okwa mona oilonga yoye.

Onawa eenghudafana detu tu di kundafaneni pamwe novaitaveli vakwetu, opo di kale da yela, hapovadinikalunga. Povadini oto kunu ombuto ii unene. Omudinikalunga oku li ngaha: Shama tuu wa i puye to ti kutya owa hala e ku kwafe, nena ote ku kwafa ngaashi ta dulu, ashike konima yefimbo ota tondoka ta ka hepaululila ookaume kaye ta ti:

Omukelefiti okwa li nena pwaame, vati di tye di tye. Ovakelefiti ve linoma. Ohava ti fye ovapaani, vo otava tondokele ngaa kufye. Otashi kwafa shike okuninga omukelefiti. Ile ngenge owa itavela ile ino itavela? Ombuto iwa ohoi ti: "Inamu lya po vali oikuvila yovadinikalunga tamu va kukutike", unene mokulyaalukila kuKalunga kavo.

**Tala kep. 5**

Josua otali ti Jehova Oye omuhupithi. Josua oyaNun. Ye mwene oHosea, Josua okwe li lukwa kuMoses. Okwa za mezimo lyEfrain, Num. 13:8,16. Mombuga Moses okwa hogolola omuwiliki gwetanga lyokukondjitha Aayamaleki, nokwa sindi sho Moses a li kondundu e na ondhimbo yaKalunga meke lye, ye li naAron naHur. Eks 17:8-16.

Okwa li omumati gwaMoses e mu thindikile kondundu yaKalunga, nokwa li puye uusiku nomutenya omasiku 40. Josua yaNun omumati gwaMoses okwa kalele metsali lyegongalo moka Kalunga i ihololele Moses. Ye mwene okwa kala puMoses elala ele nokwe mu ya meyego. Okwa lombwele Moses a gande Eldad naMedad kaa uvithe, Num.11:28.

Okwa li gumwe gwomoondaadhi kuKaanana. Inaya taamba iingomongomo ya yakwawo yo naKaleb. Sho ya li ye na eitaalo lya kwata onkama, aantu oye ya tukulile oshipotha, ye ya dhenge nomamanya.

Kalunga okwa ti Josua naKaleb mboka ya zi muEgipiti oyo ayeke taa yi kevi lyeuvaneko mokati kaantu yomimvo dhi vule, 20. Aantu sho ye ya mesilu lyaMoab noya yalulwa, (Num.26:65) osha dhimbululwa kutya aantu ayehe 6000 000 oya sile mombuga. Kaleb kaJefunes naJosua yaNun oyo ayeke ya hupu ko.

Moses naAron inaa ya mevi lyeuvaneko. Josua oku ulikwa kuKalunga a landule Moses naMoses okwe mu langeke miilonga. Kalunga okwe ya hogolola nomusaseri Elieser lyaAron ya ka topolele Aaisraeli evi lyaKaanana, Moses sho a si Israeli okwa wilikwa kuJosua. Kalunga okwa lombwele Josua a tokole omulonga gwaJordan.

Omeya gomulonga oga thikama ngoka ga zi kuumbangalantu naangoka ga zi kuumbagantu oga tondokele mefuta lyeso. Shika osha ningwa sho aasaseri ya lyata oompadhi dha wo momeya.

Palombwelo lyaKalunga Josua okwa toola mo omamanya ngoka gendhindhiliko lyoshinyengandunge shika. Konima okwe ga tungile kuGilgal. Okwa toolitha omamanya 12 ga yeleka omazimo gIsraeli mpoka pwa li aasaeli.

Metipa lyelalo lyaKaanana Josua okwa li eko logo lya tekomeya kokule, ihe okwa kwata eitaalo otswiki. Evuliko lye okuvulika kuJehova olyothaathaa nopetekopo lyaJeriko ekumithi. Akan sho a yono emusindilo Aaisraeli oya ningi omulyape gwaAi, okakunda kanathangwa. Akan sho a monika kutya nani oye oshiponga oye mu ndanzula nomamanya niinima oyu uka kolupolo oluwanawa.

Josua miilonga ye omwa li ngaa oshinkumungu sho a hangana naaGibeona ye ina pula ehalo lyaJehova. Okwa li omulumentu a pulakenwa kuKalunga etango lya thikama manga ta vunyagula "aalodhi".

Israeli nando a sindana, oshilongo ashihe inashi ninga okasilugwegwe kaJosua. Sho a li kee shi we omunyanyamagulu, okwa lombwele kuKalunga a tendele aantu, unene Aamanasse, evi lyahaandiyaka yaJordan. Oshigwana sho sha li she mu tunda naJosua okwa li e na eitaalo lyakola, okwe shi fulula ko. Pehulilo aantu oye mu pe omukunda ngoka a pula Timnat Serak.

Okwa gongaleke omazimo agehe muSikem. Mepopitho lye okwe ya dhimbulutha iinyengandunge yaJehova nokwe ya tsu iingomongomo ya longele Jehova nuuna ndoka okwa hangana nayo.

Josua okwa nyola oohapu ndhoka adhihe membo lyoohapu dhaKalunga. Okwa kutha emanya e te li dhike momuti omutalala nokuza mpoka okwe gu inana omukuku, noye mu fumbike muTimnat-Serak. Okwa li ombwale yomimvo 110.

Josua ka li katana, okwa tsakanitha iilonga yaMoses. Okwa lala evi lyaKaanana. Miikala okwa holola omulilo gwezimo lyawo nomukwawo omutegelelwa Jesus ngoka ta ka fala oshigwana mevululuko lyaaluhe.

**Jason Amakutuwa**

## LILJE

**dha za kep. 1**

"Ngenge oshoshili kutya elongo lOvakwaluther ola yukipalifwa keitavelo, lo olo li shii okuhopaenenwa, osheshi omo mu na omakanghameno emanguluko lomunhu; nena Oengeleka yOvakwaluther nai shi popye moshayela kutya Kristus okwe tu mangulula. Nai shi ninge mokuulika nhumbi Ye (Jesus) e shi ninga."

Ngenge Ovakaluther ova hala okumona ondjila yekandulepo lomaupyakadi kombinga yeitavelo osho yo momafininiko ovanhu vopemfimo eli inai pula nande ngaha: "Oukwaluther oshike?" Ndele nai pule ngaha: "Eudafano naKristus olini?"

### OKULILA EENGHALI

Ovawiliki vahapu vOvakwaluther ova yandja omatumwalaka avo oluhodi kOvakwaluther aveshe osho yo kEengeleka dikwao kwaasho shalongwa mokukalamwenyo kwomumbishofi Hans Lilje.

Amushanga wOngongahangano yOvakwaluther, omufita Carl Mau, okwa tonga ngaha:

"Omumbishofi Lilje oye umwe a li omumbishofi wovanhu aveshe mounyuni. Aveshe ove udite oluhodi omolwohole yaye okuhola ovanhu osho yo molwoshali shaye shokuudifa." Omufitaongalo Mau okwa twikila ko ta ti kutya omumbishofi Lilje "ota lilwa kOvakwaluther aveshe ovo a kala e va hokwa nokwe ve liyandjela."

(LWI)

## Iilonga yonkalathano oshike?

Iilonga yonkalathano otayi lalakanene oku-kwatha omuntu, opo i ikwathe ye mwene mokukandula po omaupyakadhi gonkalathano. Omuntu nguka oku na okukala e na onkatu miilonga mbika nenge odiploma. Ohashi vulika wo yi longwe kaantu mboka ye na o-wala ontseyo miilonga mbika omolwoluhepo lwaaniilonga.

Omuntu ota kwathwa opo i ikwathe ye mwe-ne uuna omaupyakadhi ge ga shonopekwa nenge ga kandulwa po. Omulongi gwomonkalathano ota kwatha aanamagumbo mo-maupyakadhi ngoka taga halakanitha oma-gumbo ngaashi oluhondelo, uunkolwe, oluhe-po, okwaahasilwa oshimpwiyu kwuunona niipotha pokati kaahokani. Uuna aahokani ya hepa, otaa vulu okukongelwa oopensione nomakwatho galwe.

Aavali mboka ya hepa nenge aankundi, otaa tsuwa omukumo, opo ya mone iingambeko yomalualo mbyoka tayi monika miipangelo nomuupangelo. Osho oshimpwiyu shomulongi gwomonkalathano oku kongela aanona mboka oothigwa nenge mboka inaa ya halika kaakuluntu yawo, aavali aape nenge aaputudhi (adoptive parents).

Omulongi gwomonkalathano ota kandula po wo omaupyakadhi gaalongwa ngoka tage ya imbi okwiilonga ngaashi: okwaasilwa oshimpwiyu kaakuluntu, oluhepo, okuputudhwa kwa puka nosho tuu.

Ota vulu wo okukwatha omulongi ye mwe-ne uuna pu na omaupyakadhi ngoka tage mu imbi okugwanitha iilonga.

Omulongi gwomonkalathano ota kwatha wo ndohotola mokugandja ondjokonona yomuvu yomonkalathano uuna omuvu e na uuvu mboka tau etwa komadhiladhilo ge mwene geiningitho (Histeri). Ota tala wo ngele aavu mboka ye na omikithi dhomikwayu oya yoolwa tuu momagumbo uuna ya lalekwa.

Ota longekidha wo aantu mboka taa kani-tha iilyo yawo miipangelo, ngaashi mboka taa tetwa omagulu nenge omaako, opo ya taambe ko onkalo ompe ndjoka taa ka kala nayo sho taa longitha (oartificial limbs) iilyo yopaunkulungu.

Aavu miipangelo oya pumbwa wo okwiinyanyudha. Omulonginkalathano (social worker) ota kongele aavu iinyanyudhi ngaashi uudhanitho waanona, nosho tuu.

Otashi vulika omulongi gwomonkalathano a longwe moofabulika. Iilonga ye okutaamba aantu miilonga noku ya tula mpoka taa opalele. Ota lalakanene a kandule po omaupyakadhi ngoka taga imbi omuntu a longwe iilonga ye nawa ngaashi uunyolowe, onyalo, euvathano pokati kaaniilonga naagandji yiilonga nokulundulula aaniilonga mboka itaa opalele pomahala gawo. Aaniilonga otaa longekidhilwa wo mainyanyudho. Opo uunye waakwashigwana u kandulwe po, omulongi gwomonkalathano ota longekidha oontanda, omathigathano nosho tuu.



**Maria Ukunde, Omuwambo gwtango ngoka i ilongo onkatu yotango miilonga yonkalathano (BA SW), moUniversiti yaTurffloop.**

Omulongi gwomonkalathano oha konakona omaupyakadhi ngoka taga gumu aantu aye-he ngaashi oluhepo lwooskola, lwiipangelo, nokutungitha omahala gokwiinyanyudha.

Miilonga yonkalathano omulongi oku li po oye omukwathi gwaangoka ta kongo ekwatho. Ano haye ta kandula po uudhigu oye awike ihe omukwathi owala. Ano mokukwatha omuntu otwa pumbwa ehala lyanakukwathwa, Ehala lyomukwathwa oli na okusimanekwa.

Esiku limwe omukongi gwekwatho okwe ya kombelewa omolwokwaana ombili pokati ke nomukulukadhi gwe. Okwa pula kutya omulongi gwonkalathano oku li peni. Ngame onda yamukula kutya ongame nguka. Okwa pula ndje ngele onda hokanwa noomvula dhandje mpoka dhi thike. Ngame onde mu yamukula kutya ine hokanwa. Okwa lombwele ndje kutya nandi hokanwe tango, opo ndi vule okutokola oohapu dhaakuluntu.

Inashi pumbiwa u mone omaudhigu tango, opo u vule ku ga kandula po. Nkwatho lyontseyomwenyo nonkalathano omuntu oto mu ndjandjukununa onkalo ye yopankalathano, omadhiladhilo ge, uukolele wokolutu.

Uuna wa tseya omukongi gwekwatho ngaa-ka, nena oshipu oku mu kwatha mpoka to vulu.

**Maria Shivute Ukunde (BA SW)**


## OIKUVILA YOVADINIKALUNGA

**dha za kep. 3**

Nale ovakelefiti okwa li ve holafane. Paamha oupyakadi ashike, ove li meenhangu dakula, vamwe ihava popi vali. Vamwe va kwatafana komalutu vo tava hakula; tava fiyawile neendundu doufiku nokuya koivilo ihe shi yawo.

Kaume ngenge owa hala wu kale wa fimana nokuudifa ko omulitekikalunga, kala wa yela. Imika oiimati iwa novanhu otave ku itavele. Kalunga na hambelelwe eshi e tu humbata nonena omolwoilonga yetu youwi. Omukriste kotoka mwaashi.

**E. H. Djikolo**



Ongeleka yOmowambokavango otayi longo oshilongatumo meni lyoongamba dhongeleka nosho wo pondje ngaashi kuAngola naSenegal. Oshigwana shAawambo osha hwama okulongela oshilongatumo noku shi yambidhidha pamikalo dhi ili nodhi ili.

Ngashingeyi opwa totwa OSHIKETHATUMO SHASENEGAL, paindilo lyEwilikongundu lyOshilongatumo lya ELOC. Eindilo ndika olya kolekwa wo kEpangelongeleka.

## AI ‡XANIROSA A HOLOKA

Ai ‡Xanirosa, okambo kotete melaka la ‡'Akhoë, ile Oshixwaga, oko okambo okatine ka pwa okunyanyangidhwa melaka olo. Oudwali otwa mona Evaangeli paMateus, nElaka liwa kovalessi vape, A na B.

Oileshwa oyo i li muAi ‡Xanirosa, fye ava twa kala moilonga yokulundululila Eendjovo daKalunga mOshixwaga otwe i ninga pomunghulo woilonga yelundululo. Otwa kala moilonga oyo unene fye novashamane Ovaxwaga: Väinö Namawe naSamuel Nangolo, novakulukadi vamwe ove tu kwafa yo omafimbo nomafimbo. Ndelene oileshwa ei yetu kakwa li ya ninga okambolela manga inatu mona omafano.

Paife onde lineekela, Ovaxwaga otava ka hafela okambo kavu unene naanaa molwomafano aa mawa twe a fanekelwa. Omufaneki oye Martti Pentti.

Martti oye okaana komufita Elias J. Pentti, ou a fila medu eli 1959, nomukulukadi waye Aino ou e li po ta longo mOmbelewa vongelegeka ya ELOK. Martti okwa kala muSoomi, ndele nani mboli ina dimbwa natango Ovakwanghala nhumbi ve li, eshi e va mona, kOlukonda, manga okaana keedula hetatu.

Oshifo shOMUKWETU oshe tu tseyithile kutya aatumwangeleka ooHeita oya thiki kuSenegal noya tameka okwiilonga Oshiserere, elaka lyomuhoko gumwe gwaavalelwamo moshilongo shoka, konima sho yi ilongo Oshifranisa. Ongeleka yOmowambokavango otayi tegelelwa okuyambidhidha oshilongatumo shoka tashi ningwa kaatumwangeleka, ooHeita.

Otse aalongelitumo otatu vulu oku ya kwatha noku ya galikanena osho wo okutuma omagano getu koshikethatumo shaSenegal.

Oshiketha shika otashi dhigininwa kOmbelewatumo mu ELOC, P/Bag 505 Oshakati 9290, ano mOngwediva.

Matti Seppälä

Okambo otaka landwa mOmbelewatumo kOngwediva, keesenda 50c. Ou a hala okulilandela yo uungalo, cassette, nokupwilikina oileshwa yomokambo aka kotete nosho yo Elaka liwa A na B, ya leshwa kuSamuel Nangolo, na kundafane novanambelewatumo. Oko taku monika yo omaimbilo mOshikwanghala oo a longekidwa kuSakaria Nghikefeliwa naSamuel Nangolo.

Omuhoko mukwao wOvakwanghala, ovo tava lukwa Ovangongolo, navo yo otava diinine okupopya nove hole elaka lavo vene, Oshingongolo. Navo otava ka mona paife omhito yokulesha oumbo ava: Elakaliwa, A na B, melaka lavo. Otu li yo moilonga yokulundululila Evaangeli lotete melaka lavo.

Moilonga yelundululo omunhu luhapu ou udite oonini wounongo woye. Shaashi okushiiva elaka limwe nawa, itashi wana; ou na okushiiva omalaka mahapu. Omolwasho otaku pumbiwa tu kale po ongudu, 'team', yovalundululi, omo umwe ta shiiva okukonakona nawa eetekisti; omukwao ha popi nawa elaka olo hatu lundululile mo; na umwe vali oku na omatwi mawa okuuda eshi sha wapala naashi inaashi wapala, palaka.

Ngenge pe na umwe ta shiiva nawa aishe ei, oye ta ningi omulundululi muwa nande na kale oye aeke.

Terttu Heikkinen

Omusamane Sam Nuyoma, omupresidende gwa Swapo, okwa holola omasiku ngaka muMaputo sha Mocambinque, kutya ye okwi ilongekidha okutsakane na noministeli yotango ya S.Africa, "ethimbo kehe nopenhala kehe" ngele omukalo nguka ogwo tagu kutha po omaupyakadhi gaNamibia.

"Nonando omusamane Vorster oha lundile ndje kutya ngame omukomonisi, ngame kandi mu tonde nando. Ihe otandi kondjitha owala epangelo lye, ndyoka tali hepeke aantu yoshigwana shandje," osho Nuyoma a holola moshipopwiwa she.

Nuyoma ngoka a li a kala moshigongi shAamocambinque, okwa endulula omakankameno ga Swapo ngoka S. Afrika ena tango okugwanitha, opo ya vule okuya moonkundathana naye.

"Tse otatu pewa omakwatho, ihe otse tatu kondjo tse yene, nonando otashi tu pula oomvula dhi vule 10 sigo 15," osho Nuyoma a ti.

**(Advertiser)**

**Oyendji oya dhipagwa muUganda**

Ekonakono lya ningwa kehangano lyuuthemba womuntu, Amnest-International, otali holola kutya aantu oyendji oya dhipagithwa kepangelo lyomupresidende Amin, okuza uuna sho a yi koshipundi.

Okuza 1971, aantu 50 000 sigo 3000 000 oya si. Po-masiku ngaka opuna wo omafekafeko gaantu ya dhipagwa. Oshiningwanima osha etwa kaantu mboka aniwa ya li taya kambadhala okukutha ko epangelo lyomupresidende Amin koshipundi. Omumbisofi omukuluntu gwAngilikana okwa dhipagwa wo omasiku ngaka muUganda sha zile miiningwanima mbika.

**Ya londodhwa molwokulya**

Aayamerika oya kumagidhwa molwaasho haya li unene iikwamagadhi niikwasuuka oyindji.

Okomitiye yiikulya muAmerika, oya ti kutya okulya nawa otaku shonopeke uuvu womutima, osho wo eso lyaanona.

Osuuka oyindji nomongwa ogwindji otayi eta oshiponga shomikithi dha tumbulwa osho wo ombato, uuvu womuuluyi "harsingbloeding".

**Okatongotongo oka eta ehulilo lyOombulu**

CAPE TOWN: Okatongotongo oka tula Ombulu koshimbulukwena, "osho omuprofesori F. A. van Jaarsveld gokuPretoria a ti, moshigongi shoka sha li tashi kundathana "Onakuyiwa yOombulu."

Okwa ti kutya oshiyolitha okutala aantu opo ye li mondapo, ya hala okulundulula omulandu gwawo, omoluumbanda kutya otayi ikanithile oonkondo dhokupangela, sho ye li po omwaalu omushona.

**Eyakulo lyokoongamba kaagundjuka "Aawe!"**

He yalsak Nel Myberg (19), ngoka a sile koongamba okwa ti kutya ina panda aamati aagundjuka yaa na ontseyo ya tumwe koongamba.

Aniwa Isak okwa yi muukwiita, muJuni omumvo gwa-zi ko. Konima yiiwike ine okwa adhika yu uvitile oluhodhi onkalo ya S. Africa ya tale wo kwaashoka tashi ningwa muUganda.

**(Suidwester)**

**lihuna yaAmin**

KAMPALA—Edhipago lyomumbisofi omukuluntu osho wo lyoministeli mbali dhomepangelo lyuUganda oshinima sha eta eipulo enene muuyuni.

Omumbisofi Henry Okullu gwomuKenya okwa pangula wo lihuna ya longwa kuAmin. Metumwalaka lye paradio okwa holola kaantu mboka yu uvitile oluhodhi onkalo ya S. Africa ya tale wo kwaashoka tashi ningwa muUganda.

Omupresidende gwAmerika osho wo omapangelo galwe muuyuni oya pangula noonkondo ilonga yomupresidende Amin.

Efatululo la yandjwa kokangudukonakoni kaInterparliamentary Union (IUP) moGeneve, oko ka li keuya okukonakona oukwatya womoshilongo eshi, otali ti kutya oshilongo eshi otashi ka hangika komaupyadi mahapu. OTurnhalle oya fa itai ka dula okukufa po omaupyakadi oshilongo eshi.

Ekonakono eli ola ningwa kovakalelipo vaFinland, Pakistan, Rusland, Zaire naBrittanje va hoololwa Kehangano IPU olo li li medina leepalemente 71 mounyuni

Epangelo la S. Africa ola anyena ovakonakoni ava oufemba wokuuuya muNamibia, opo va ninge omakonakono. Omakonakono aa ove a ninga ashike mokukundafana novaleli voilongo yaZambia naTanzania, ovakalelipo omahangano omakondjelimanguloko osho yo ovanambelewa va VVO.

Ekonakono la ningwa kokangudu aka omwa hololwa kutya eenghundafana edi da totwa ku S. Africa mu-Namibia konima yeehani 18, oda koleka ashike outondwe ou wa etwa ku S. Africa mokupangela oshilongo eshi.

Omukanda owa twikila tau hepaulula nhumbi S. Africa ina fimaneka oufemba wovadalelwamo osho yo omadiladilo oonyuni oo a hala Namibia li kale la manguluka.

**(Advertiser)**

**KLOPPERS OTA PULA EVI**

Omukalelipo gwAakushu "Kleurling" moTurnhalle, omusamane Andreas Kloppers, okwa li a ningi omasiku ngaka oonkundathana noministeli ya S. Africa omusamane Vorster osho wo noministeli yiinima yooKleurling H. H. Smit.

Aniwa okwa hala oshitopolwa shoka shi li pokati koOvenduka noOmbaye, shuunene woohektor dhoomiliyona mbali.

**Muller a efa po oilonga**

Oministeli yoikwapondje ya S. Africa omushamane Hilgard Muller okwa efa po oilonga yaye youministeli omafiku aa.

Omushamane Pik Botha ou a li omukalelipo wa S. Africa koIwanahangano (UNO) nokOiwanaahangana yaAmerika (USA) oye a ya ponhele yaye.

**Osikola yaMartin Luther ya patuluka**

Osikola yopombanda "Martin Luther High School," yOngeleka ya Elk, ndjoka yu uvikile pehulilo lyomumvo gwa piti kutya oya patwa kepangelo, oya patuluka omasiku ngaka.

Osikola ndjika ya li ya patwa pehulilo lyomumvo 1976, molwaasho aalongwa ya tindi okushanga ekonakono ndyoka lyopalongo lyaaluudhe. Pakuuva peha lyOshimbulu shoka kwa li hashi longithwa shito kashi mo we mosikola ndjika.

Osikola sho ya tamekulula ngashingeyi, miilongwa ayihe otaya longitha owala Oshiingilisa.

**OONDANDO TADHI LIMBIKE**

WINDHOEK—Pashifo "Pionier" sheti 18.2.77 okwa dhimbululwa uukwaanuyuki melanditho lyiitenda yihauto moongalasho dhomOvenduka. Aalandi yamwe mboka ya tumbula nokuli oongalasho dhimwe koshito, oya dhimbulula eyooloko mitenda iipe ya faathana, moondando, moongalasho noongalasho.

Oshitenda shimwe osha landwa R90 omanga palwe R38 sigo nokuli R25 adhike. Nenge R173.93 okuyeleka R45. Oministeli yEliko Heunis oya gandjele momumvo 1975 elombwelo, kutya oofambilika dhiihauto osho wo aalandithi ayehe oondando dhawo inadhi kala dhi lyaathane kokule noonkondo.

Silas Sh. Angula koRio-Tindo ota nyola ngeyi: Meti 14.11.1976 otwa li twa gongala moshigongi shaagundjuka muSwakopmund. Okwa li epulo limwe lya pulwa ihe aayamukuli oya nyengwa oku li yamukula sigo oompaka. Otali ti ngeyi:

**Jesus ta ti: Itandi galikanene uuyuni, ihe oyo mboka we ya pandje. Ngele ota popi aayapostoli, nani Ye okwa sile tango mboka e ya pewa, opo ihe a sile uuyuni?**

EYAMUKULO

Egalikano lyaJesus oli li moongundu ndatu. 1) Jesus oti igalikanene ye mwene nenge ta hambelele, Joh.17:1-5.

2) Jesus ota galikanene aalongwa ye mboka e li nayo melongo, Joh.17:6-19.

3) Jesus ota galikanene ayehe mboka taye ki itaalithwa kaalongwa ye, Joh. 17:20-26.

Epulo lyyoye oli li mongundu ontiyali. Naamboka taya lesa nokuleshulula ontopolwa ndjika itaya pingakanitha no itaya limbili-lwa oshinima shika shegalikano lyaJesus.

Rev. F. Ashipala

**ENDELELA WU IMBESTELELE OMUKWETU GWO-NUUMVO**

OVANANGOLO VE LIMONENA OSHINYANGA SHAVO

Eeranda di dule 100, oda ongelwa kovakwaneongalo mOnangolo, mOushilo waUkwanyama, opo va shakenife eemhumbwe detungo lolupaleongalo lavo mewiliko lomuyevangeliste Gideon Shakaalela.

Okudja 1972 opwa li pwa ningwa etameko metungo eli lolupaleongalo mewiliko lomufitaongalo Johannes Hamulungu. Eshi omufitaongalo Hamulungu a lundululilwa kOndobe, omuyevangeliste meongalo okwa twikila nokuwilika oilonga oyo.

Oimaliwa konyala R140,00, okwe i ongelifa okushakenifa eemhumbwe doilonga molupaleongalo. Oipundi, oshitafula neemhumbwe dikwao paife omo di li.

Oshivilo shehambelelo Kalunga eshi a kwafa molonga i fike apa, osha ningilwe muKotoba neudo. Ovakriste vahapu noovene vomikunda omo va li mehambelero eli.

Amushanga gwoshifo Omukwetu Oniipa

Omusimanekwa,

MOmukwetu gweti 15.2.1977 omwa shangwa kombinga yokanona ka valwa nomalwaala gaali. Oshinima sha tya ngaaka osha pumbwa tuu okutaandelithwa moshifo?

Maanona nomaakuluntu omu na oyendji ya valwa ye na oshiponga shontumba, ngele molutu nenge moondunge. Nenge ya yooloka naantu yalwe. Tse aantu otwa shitwa kuKalunga twa yooloka nayamwe oya yooloka unene nenge ye na oshiponga itaashi vulu okwoopalekwa. Ihe inatu pumbwa okutala omuntu a shitwa ngaaka ngomukumithi, pamwe ta yolitha nenge ta eta epopyo.

Omuntu a tya ngaaka na talwe ngomuntu a simana pwa talwe eyooloko nenge uulema we. Na taambwe nohole ye na kwathwe wo mpoka tashi vulika. Ondi inekela kutya aakuluntu yokanona haka ka tumbulwa mOmukwetu oye mu taamba nawa noye mu hole ngaashi okanona kehe ka pumbwa ohole.

Andola aashiinda natse atuhe osho tu ninge naantu ya yooloka nenge ya mono oshiponga shontumba. Okukala kwetu olwindji otaku ehameke nayi omuntu a tya ngaaka.

Omukwetu, nonando inagu shanga nomukalo gwokudhina nenge gwokuyolitha, pakutala kwandje inagu ninga nawa mokushanga kombinga yo "abnormality" yomuntu a shitwa kuKalunga nokutumbula edhina lye nokuli.

Okushanga kwa tya ngaaka inandi zimina momwenyo gwandje nonda hala atuhe mokukala kwetu tu simaneke no tu hole omuntu a shitwa a yooloka.

Omuntu a tya ngaaka oku na omaudhigu ga gwana, inatu pumbwa okugwedhela sha komutenge gwe.

Neyelo gweni Olle Eriksson

OMUKWETU

Oye oshifo shOngeleka Onkwaevangeli paLuther yomOwambokavango.

Oha nyanyangidhwa mOshinyanyangidho shOngeleka mOniipa.

Omukuluntu gwOmukwetu omumbisofi dr. Leonard Auala.

Amushanga gwOmukwetu omulongi Ambrosius W. Amutenja.

Ondando yOmukwetu komumvo, muAfrika R 2-00, kombanda yomafuta R 4-00.

Omambesitelo pamwe noondando naga tumwe kOmukwetu Oniipa, P/B. 2013 Ondangwa 9270